

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
Օ Ր Ե Ն Ք Ը

«ՓՈՍՏԱՅԻՆ ԿԱՊԻ ՄԱՍԻՆ» ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔՈՒՄ  
ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ

**Հոդված 1.** «Փոստային կապի մասին» Հայաստանի Հանրապետության 2004 թվականի դեկտեմբերի 14-ի ՀՕ-46-Ն օրենքի (այսուհետ՝ Օրենք) 3-րդ հոդվածը շարադրել հետևյալ խմբագրությամբ.

**<<Հոդված 3. Օրենքում օգտագործվող հիմնական հասկացությունները**

Սույն օրենքում օգտագործվող հիմնական հասկացություններն են՝  
**փոստային կապ**՝ փոստային առաքանու ընդունումը, մշակումը, փոխադրումը և հանձնումն ապահովող կապի տեսակ, որը տեխնիկական և տրանսպորտային միջոցների միասնական արտադրատեխնոլոգիական համալիր է.

**փոստային առաքանի**՝ հասցեագրված նամակագրական թղթակցություն, փոստային ծանրոցներ ու փոստային բեռնարկեր, համապատասխան փաթեթավորումով տպագիր հրատարակություններ.

**փոստային առաքում**՝ փոստային առաքանու ընդունում, մշակում, փոխադրում և հանձնում հասցեատիրոջը.

**միջազգային փոստային և/կամ սուրհանդակային առաքում**՝ երբ փոստային առաքանին առաքվում է Հայաստանի Հանրապետության տարածքից դուրս, ստացվում է այլ երկրներից և առաքվում Հայաստանի Հանրապետության տարածքում կամ տարանցիկով անցնում է Հայաստանի Հանրապետության տարածքով.

**ներհանրապետական փոստային և/կամ սուրհանդակային առաքում**՝ երբ փոստային առաքանին առաքվում է Հայաստանի Հանրապետության տարածքում.

**նամակագրական թղթակցություն**՝ հասարակ և գրանցվող նամակներ, փոստային բացիկներ, սեկոգրամներ, փաթեթներ և փոքր փաթեթներ.

**հասարակ փոստային առաքանի**՝ փոստային առաքանի, որն ընդունվում է ուղարկողի կողմից առանց նրան անդորրագիր հանձնելու և ստացողին հանձնվում է առանց ստորագրության.

**գրանցվող փոստային առաքանի**՝ փոստային առաքանի, որն ընդունվում է ուղարկողին անդորրագրի հանձնումով, և ստացողին (օրինական ներկայացուցչին) հանձնվում է ստորագրությամբ՝ անձնագրի առկայության դեպքում.

**գնահատված փոստային առաքանի**՝ փոստային առաքանի, որն ընդունվում է ուղարկողի կողմից ներդրվածքի արժեքի գնահատմամբ, ուղարկողին անդորրագրի հանձնումով, և ստացողին հանձնվում է ստորագրությամբ: Գնահատված արժեքի գումարի առավելագույն չափը սահմանում է փոստային կապի օպերատորը.

**սեկոգրամ**՝ բացառապես կույրերի համար նախատեսված փոստային առաքանի, որը հանձնվում է բաց տեսքով, սեկոգրաֆիայի եղանակով գրված նամակագրական

հաղորդակցություններով և հրատարակություններով, սեկոգրաֆիայի նշաններով՝ կլիշեներով, ձայնագրություններով, տիֆլոտեխնիկական միջոցներով.

**դրամական միջոցների փոստային փոխադրություններ՝** «Վճարահաշվարկային համակարգերի և վճարահաշվարկային կազմակերպությունների մասին» Հայաստանի Հանրապետության օրենքի համաձայն դրամական (փողային) փոխանցումներ.

**փոստային կապի ծառայություններ՝** փոստային կապի օպերատորի գործողություն կամ գործունեություն կապված հասարակ, պատվիրված, գնահատված և ուղիղ փոստային առաքանիների ընդունման, մշակման, փոխադրման և հանձնման հետ.

**փոստային կապի ունիվերսալ ծառայություններ՝** օրենքով և փոստային կապի բնագավառում լիազորված պետական կառավարման մարմնի կողմից սահմանված որակի չափանիշներին համապատասխան, օգտվողների համար Հայաստանի Հանրապետության ամբողջ տարածքում հասանելի, մշտական հիմունքներով և մատչելի գներով մատուցվող փոստային կապի ծառայություններ՝ կապված մինչև 2կգ. քաշով նամակագրական թղթակցության, մինչև 20կգ. քաշով ծանրոցների ներհանրապետական և Հայաստանի Հանրապետության տարածքից դուրս փոստային առաքումների, ինչպես նաև գյուղական բնակավայրերում պաշտոնական պարբերականների առաքումների հետ:

**սուրհանդակային կապի ծառայություն՝** փոստային կապի գործունեության տեսակ, որի դեպքում փոստային առաքանին առաքման ամբողջ ժամանակահատվածում՝ ուղարկողից մինչև հասցեատեր, ուղեկցվում է միևնույն իրավաբանական անձի կամ անհատ ձեռնարկատիրոջ կողմից.

**հատուկ կապի ծառայություն՝** սուրհանդակային կապի ծառայության տեսակ, որի դեպքում իրականացվում է հատուկ առաքանիների ընդունումը, մշակումը, փոխադրումը և հանձնումը.

**հատուկ առաքանի՝** փոստային առաքանի, որը պարունակում է միայն Հայաստանի Հանրապետության օրենսդրությամբ և միջազգային պայմանագրերով պահպանվող գաղտնի տեղեկություններ և առարկաներ, թանկարժեք մետաղներ և թանկարժեք քարեր, ինչպես նաև դրանցից պատրաստված զարդեր, որոնք ուղարկվում կամ ստացվում են իրավաբանական անձանց կամ անհատ ձեռնարկատերերի կողմից.

**ուղիղ փոստային առաքանի՝** փոստային առաքանու տեսակ, որը իր մեջ պարունակում է գովազդային, տեղեկատվական և/կամ հրապարակային նյութեր: Առաքանու ներդրվածքը պետք է պարունակի միատեսակ հաղորդակցություն կամ տեղեկատվություն, որոնք չեն կարող փոփոխել առաքվող նյութերով հաղորդվող տեղեկությունների իմաստը, բացառությամբ այն տեղեկությունների, որոնցով սահմանվում են հասցեատիրոջ անունը, հասցեն, նույնականացման համարը և հասցեագրմանն առնչվող այլ տեղեկություններ:

**օգտվող՝** ֆիզիկական կամ իրավաբանական անձինք, տեղական ինքնակառավարման կամ պետական կառավարման մարմիններ, որոնք օգտվում են փոստային կապի կամ սուրհանդակային կապի ծառայություններից, որպես ուղարկող կամ ստացող.

**ստացող (հասցեատեր)՝** փոստային կապի կամ սուրհանդակային կապի ծառայություններից օգտվող, որին հասցեագրված են փոստային առաքանի, դրամական միջոցների փոստային փոխադրություններ, հեռագրային կամ այլ հաղորդագրություններ.

**ուղարկող՝** անձ, ով պատասխանատու է փոստային առաքանու ներդրվածքի համար, ում կամքով և ում անունից առաքանին հանձնվել է փոստային կապի կամ սուրհանդակային կապի օպերատորին.

**փոստային կապի և սուրհանդակային կապի ծառայությունների մատուցման ժամկետ**՝ փոստային կապի և սուրհանդակային կապի որոշակի ծառայությունների մատուցման ժամկետներից և նորմատիվներից բաղկացած ամբողջություն՝ փոստային և սուրհանդակային կապի օպերատորի սահմանած առանձին տեխնոլոգիական գործողությունների կատարման համար.

**հսկիչ ժամկետներ**՝ փոստային առաքանու և դրամական միջոցների փոստային փոխադրությունների՝ փոստային կապի ընդունման վայրից մինչև փոստային կապի օբյեկտի հանձնման վայրն առաքման, ինչպես նաև փոստային կապի օբյեկտներում դրանց վերամշակման առանձին գործառնությունների համար սահմանված ժամանակ.

**փոստային կապի կամ սուրհանդակային կապի ծառայությունների մատուցման սակագին**՝ փոստային կապի և սուրհանդակային կապի ծառայությունների մատուցման վճարման համար սահմանված չափ.

**փոստային կապի օպերատոր**՝ փոստային կապի ծառայություններ մատուցելու իրավունք ունեցող իրավաբանական անձ կամ անհատ ձեռնարկատեր, որն իր գործունեությունն իրականացնում է փոստային կապի գործունեության լիցենզիայի համաձայն՝ պահպանելով սույն օրենքով սահմանված փոստային կապի օպերատորի գործունեության կանոնակարգով սահմանված պայմանները և պահանջները.

**սուրհանդակային կապի օպերատոր**՝ միջազգային սուրհանդակային կապի օպերատոր կամ ներհանրապետական սուրհանդակային կապի օպերատոր՝ սուրհանդակային կապի ծառայություններ մատուցելու իրավունք ունեցող իրավաբանական անձ կամ անհատ ձեռնարկատեր, որն իր գործունեությունն իրականացնում է փոստային կապի գործունեության լիցենզիայի համաձայն՝ պահպանելով սույն օրենքով սահմանված սուրհանդակային կապի օպերատորի գործունեության կանոնակարգով սահմանված պայմանները և պահանջները.

**միջազգային սուրհանդակային կապի օպերատոր**՝ սուրհանդակային կապի ծառայություններ մատուցելու իրավունք ունեցող իրավաբանական անձ կամ անհատ ձեռնարկատեր, որն իր գործունեությունն իրականացնում է Հայաստանի Հանրապետության տարածքում, ինչպես նաև Հայաստանի Հանրապետության տարածքից այլ երկրներ կամ այլ երկրներից Հայաստանի Հանրապետություն, լիցենզիայի համաձայն՝ պահպանելով սույն օրենքով սահմանված սուրհանդակային կապի օպերատորի գործունեության կանոնակարգով սահմանված պայմանները և պահանջները.

**ներհանրապետական սուրհանդակային կապի օպերատոր**՝ սուրհանդակային կապի ծառայություններ մատուցելու իրավունք ունեցող իրավաբանական անձ կամ անհատ ձեռնարկատեր, որն իր գործունեությունն իրականացնում է բացառապես Հայաստանի Հանրապետության տարածքում, լիցենզիայի համաձայն՝ պահպանելով սույն օրենքով սահմանված սուրհանդակային կապի օպերատորի գործունեության կանոնակարգով սահմանված պայմանները և պահանջները.

**կանոնակարգ**՝ Հայաստանի Հանրապետության կառավարության սահմանած փոստային կապի գործունեության լիցենզիայի շրջանակներում փոստային կապի օպերատորի կամ սուրհանդակային կապի օպերատորի գործունեություն իրականացնող անձանց՝ տվյալ գործունեությանը վերաբերող տարածքային, տրանսպորտային միջոցների, տեխնիկական և տեխնոլոգիական նվազագույն չափանիշներ, ինչպես նաև սույն օրենքից և այլ իրավական ակտերից բխող պարտադիր պայմաններ և պահանջներ սահմանող իրավական ակտ.

**փոստային կապի ազգային օպերատոր՝** փոստային կապի օպերատոր, որը մատուցում է փոստային կապի ունիվերսալ ծառայություններ և կրում է Հայաստանի Հանրապետության փոստի խորհրդանիշը.

**փոստային կապի օբյեկտներ՝** փոստային կապի օպերատորի առանձնացված ստորաբաժանումներ՝ փոստի տեսակավորման և փոխադրման կենտրոն, օդանավակայաններին կամ երկաթուղային կայարաններին կից փոստի փոխադրման բաժանմունքներ, փոստափոխանակման կետեր, փոստային բաժանմունքներ, փոստային շարժական կետեր և այլն.

**փոստային կապի երթուղի՝** փոստային կապի օբյեկտների միջև փոստային տրանսպորտի երթուղի.

**փոստային կապի ցանց՝** փոստային կապի օբյեկտների և փոստային երթուղիների ամբողջություն.

**փոստային կապի միջոցներ՝** փոստային կապի ծառայություններ մատուցելու համար օգտագործվող շենքեր, շինություններ, ոչ բնակելի տարածքներ, սարքավորումներ և փոստային տրանսպորտ, փոստային ծրարներ, բացիկներ և փոստային տարա.

**սուրհանդակային կապի միջոցներ՝** սուրհանդակային կապի ծառայություններ մատուցելու համար օգտագործվող շենքեր, շինություններ, ոչ բնակելի տարածքներ, սարքավորումներ և տրանսպորտ.

**փոստային վճարման պետական նշաններ (նիշեր)՝** փոստային նամականիշեր, ֆրանկոմեքենաների և նիշավորող մեքենաների դրոշմներ կամ այլ նիշեր, որոնք գործողության մեջ են դրվում փոստային կապի բնագավառում լիազորված պետական կառավարման մարմնի կողմից և հաստատում են փոստային կապի ազգային օպերատորի կողմից փոստային կապի ծառայությունների մատուցման վճարումը.

**Ֆրանկոմեքենա և նիշավորող մեքենա՝** նամակագրական թղթակցության վրա փոստային կապի ծառայությունների մատուցման վճարումը, տվյալ թղթակցության ընդունման ամսաթվերը և այլ տեղեկատվություն հաստատող փոստային վճարման պետական նշաններ դրոշմելու համար նախատեսված մեքենաներ.

**փոստային դասիչ՝** փոստային կապի օբյեկտին տրվող փոստային հասցեի պայմանական թվային նիշավորում, որը գործում է Հայաստանի Հանրապետության ամբողջ տարածքում և պարտադիր է փոստային կապի օպերատորների համար.

**անվանական իր՝** սարք (դրոշմ), որը նախատեսված է փաստաթղթերի և փոստային առաքանիների դրոշմվածքների համար՝ նշելով փոստային կապի օբյեկտի անվանումը, փոստային առաքանու ընդունման և հանձնման ամսաթիվը և այլ տեղեկատվություն.

**փոստարկղ՝** հասարակ նամակների և փոստային բացիկների հավաքման համար նախատեսված հատուկ փակվող արկղ.

**փոստային բաժանորդային պահարան՝** փակվող խցիկներով հատուկ պահարան, որը տեղադրվում է բնակելի շենքերում՝ հասցեատերերին ուղղված հասարակ փոստային առաքանիների պարբերականների, գրանցվող փոստային առաքանիների վերաբերյալ ծանուցումներ ստանալու համար.

**բաժանորդային արկղ՝** հասցեատերերի կողմից փոստային առաքանի ստանալու համար որոշակի ժամկետով տրամադրվող՝ փոստային կապի օբյեկտներում տեղադրվող փակվող խցիկներով հատուկ պահարան.

**փոստային բաժանորդային արկղ՝** հասցեատերերի կողմից փոստային առաքանի ստանալու համար նախատեսված հատուկ փակվող արկղ.

**հենակետային փոստարկղ`** փոստային առաքանին ժամանակավորապես պահելու կամ հասցեատերերի կողմից փոստային առաքանի ստանալու համար հանձնման կետերում նախատեսվող հատուկ փակվող պահարան:

Սույն օրենքով սահմանված դրամական փոստային փոխադրություններին վերաբերող դրույթները չեն տարածվում սուրհանդակային կապի օպերատորի վրա:>>:

**Հոդված 2.** Օրենքի 6-րդ հոդվածը լրացնել հետևյալ բովանդակությամբ նոր պարբերությամբ`

<<Ներհանրապետական սուրհանդակային կապի օպերատորները պարտավոր են յուրաքանչյուր տարվա համար ապահովագրել իրենց գործունեությունը սուրհանդակային կապի ծառայությունների մատուցման հետ կապված ռիսկերից` նախորդ տարվա շրջանառության հիսուն տոկոսի չափով, սակայն ոչ պակաս 3 մլն դրամից:>>

**Հոդված 3.** Օրենքը լրացնել հետևյալ բովանդակությամբ 8.1 և 8.2 հոդվածներով.

**<<Հոդված. 8.1 Փոստային կապի ունիվերսալ ծառայությունների որակն ապահովող պահանջները**

1. Փոստային կապի ունիվերսալ ծառայություններ մատուցող փոստային կապի օպերատորը պետք է ապահովի Հայաստանի Հանրապետությունում առաքանիների հավաքման և հանձնման հաճախականությունը` Երևան քաղաքում` ամեն օր, հանրապետության մարզերում` շաբաթական հինգ օր, բացի կիրակի և երկուշաբթի օրերից:

2. Փոստային կապի ունիվերսալ ծառայություններ մատուցող փոստային կապի օպերատորն իրավունք ունի սահմանել առաքանիների հավաքման և հանձնման հաճախականության բացառիկ դեպքեր`

1) օրենքով սահմանված տոներին և հիշատակի օրերին,

2) բարձր լեռնային վայրերում փոստային առաքանին հավաքելու և տեղ հասցնելու համար:

3. Փոստային կապի ունիվերսալ ծառայություններ մատուցող փոստային կապի օպերատորը հանձնված հասարակ նամակագրական թղթակցության ոչ պակաս 90%-ը հասցեատերերին պետք է առաքի Երևան քաղաքում` հանձնման օրվանը հաջորդող մեկ աշխատանքային օրվա ընթացքում, հանրապետության մարզերում, Երևան քաղաքից մարզեր և մարզերից Երևան քաղաք` հանձնման օրվանը հաջորդող երեք աշխատանքային օրվա ընթացքում>>:

**<<Հոդված. 8.2 Ուղիղ փոստային առաքում**

1. Ուղիղ փոստային առաքանու առաքման դեպքում ուղիղ փոստային առաքանու միանգամյա առաքման հանձնվող առաքանիների քանակը չպետք է պակաս լինի փոստային կապի բնագավառում լիազորված պետական կառավարման մարմնի կողմից սահմանված նվազագույն քանակից:

2. Ուղիղ փոստային առաքանու փաթեթավորման վրա պետք է նշված լինի <<գովազդ>>, <<գովազդ փոստով>> կամ <<ուղիղ փոստ>>:

3. Ուղիղ փոստային առաքում չի համարվում հարկային կամ այլ հաշվարկային փաստաթղթերի և/կամ ֆինանսական կամ այլ հաշվետվությունների առաքումը, աշխատանքների կատարման, ծառայությունների մատուցման կամ ապրանքների մատակարարման մասին հաճախորդներին ներկայացվող հաշվետվությունները և/կամ վճարումների վերաբերյալ ծանուցումներն ու հաշիվները, ինչպես նաև տարբեր հաղորդագրություններ կամ տեղեկություններ պարունակող մեծածավալ այլ փոստային առաքումները>>:

**Հոդված 4.** Օրենքի 11-րդ հոդվածի 2-րդ և 4-րդ պարբերությունները խմբագրել հետևյալ նոր բովանդակությամբ.

<<Փոստային կապի գործունեության լիցենզիայի շրջանակներում լիցենզավորվում է ինչպես փոստային կապի ծառայությունների գործունեությունը, այնպես էլ միջազգային սուրհանդակային կապի ծառայությունների գործունեությունը և ներհանրապետական սուրհանդակային կապի ծառայությունների գործունեությունը:>>:

<<Հայաստանի Հանրապետությունում փոստային կապի գործունեության լիցենզիան տալիս է լիազորված մարմինը՝ <<Լիցենզավորման մասին>> Հայաստանի Հանրապետության օրենքին համապատասխան: Փոստային կապի գործունեության լիցենզիայի շրջանակներում, սույն հոդվածի երկրորդ պարբերությանը համապատասխան, լիցենզավորվող յուրաքանչյուր գործունեության համար տրվում է փոստային կապի գործունեության առանձին լիցենզիա՝ լիցենզիայում նշելով փոստային կապի բնագավառում իրականացվող լիցենզավորման ենթակա գործունեության տեսակը (փոստային կապի ծառայություններ կամ միջազգային սուրհանդակային կապի ծառայություններ կամ ներհանրապետական սուրհանդակային կապի ծառայություններ):>>:

**Հոդված 5.** Օրենքի 18.1-րդ հոդվածի 3-րդ մասն ուժը կորցրած ճանաչել:

**Հոդված 6.** Օրենքի 20-րդ հոդվածի 1-ին մասում <<Փոստային կապի կամ սուրհանդակային կապի ծառայություններից օգտվողն>>, բառերը փոխարինել <<Ուղարկողն>> բառով, իսկ <<օգտվողի>> բառը փոխարինել <<ուղարկողի>> բառով:

**Հոդված 7.** Օրենքի 22-րդ հոդվածի 2-րդ մասում <<փոստային անվանական պահարանների,>> բառերը փոխարինել <<բաժանորդային արկղերի, >> բառերով:

**Հոդված 8.** Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը: